

Fangzcwngzgangj:

Roengz Lajmbanj Cienz Cingsaenz, Lwnh Doxgiet Gouz Hwnghoengh

防城港：下基层传精神，话团结谋振兴

9 nyied 2 hauh, Fangzcwngzgangj Si Sicangz Genhgvanzgiz bae daengz aen mbanj venjingaeu guh hwnghoengh lajmbanj de——Fangzcwngz Gih Nazliengz Cin Mbanjdaibingz, gyoengqde lwnhgangj le gij cingsaenz gangjavah youqgaenj Siz Ginbingz cungsuhi laeng Aen Hoih Hong Minzczu Cunghyangh. Mbanj de youq henzguk, dep gyawj Biengzgeu, dwg aen diemj doxcaemh cauhaeb minzczu doxgiet ndeu. Gyoengqde caeuq Bouxcuengh、Bouxgun、Yauzczu daengj minzczu beixnuengx lwnh le gij cingsaenz aenhoih, caemhcaiq ganggoj gyausim, camcam vunzlai hag le gij cingsaenz neix youh dwg baenzlawz siengj, caeuq vunzlai doxcaez vehsuenq baenzlawz coicaenh minzczu doxgiet、guhhoengh lajmbanj daengj. Neix hawj gij cingsaenz aenhoih caeuq gij cingsaenz gangjavah Siz cungsuhi cienz daengz lajmbanj, caemhcaiq dazyinx vunzlai laebdaeb riengz aendangj byaij, gag rox henhoh guekcoj caezcaemh、minzczu doxgiet caeuq aenbiengz an'onj.

(Liu Gaihginh / 廖开军)

► Aen yienhciengz lwnhgangj, vunzlai dingq dwk gig nyinhcaen.



Nanzningz Hai Aen Hezdiuzvei Doicaenh Hong Cauhaeb Aen Si Yienghbanj Guh Minzczu Doxgiet Baenaj Daengx Guek

南宁召开推进全国民族团结进步示范市创建工作协调会

9 nyied 2 hauh, Nanzningz Si hai Aen Hezdiuzvei Doicaenh Hong Cauhaeb Aen Si Yienghbanj Guh Minzczu Doxgiet Baenaj Daengx Guek, hagsib caemhcaiq gvancez gij cingsaenz Aen Hoih Hong Minzczu Cunghyangh caeuq gij gangjavah youqgaenj Siz cungsuhi ngonzyawj Gvangsiah gangj de, dungyenz baijbouh doicaenh gij hong gven-daengz cauhaeb minzczu doxgiet baenaj. Bi 2016 Nanzningz aeu ndaej aen mingzdaeuz miznaj “aen si yienghbanj guh hozdung cauhaeb minzczu doxgiet baenaj daengx guek”. Daengx si gak gaep gak bouhmonz gig insik caemhcaiq

mboujduenh gyamaenh aen mak-baenz neix, gag rox diuz rap gwnzmbaq naek raeuh, hong aeu guhsaed guhsaeq. Vunzlai laebndei aen swhsiengj “buenz geiz ndeu”, cauhaeb minzczu doxgiet baenaj daj cukmaenh gij eiqsik caez-caemh Cunghvaz Minzczu hwnqdin. Daihgya dawz gij saeh neix haeujsim, swhsiengj caezcaemh, caiq haeujlaeg dingjnanz cauhaeb minzczu doxgiet baenaj, guh'ok fwnhvez cauhaeb naekna daeuj, guhndei hong cauhaeb, doidoengh hong minzczu doxgiet baenaj Nanzningz yamq hwnj mbaek moq bae.

(Nez Senhfung / 聂先锋)

Haihag Dangzgoq Daih'it: Minzczu Doxgiet Ranz Caen Ndeu

开学第一课：民族团结一家亲

9 nyied, aen haggeiz moq youh daengz lo. Yungzsuij Myauzczu Swciyen Mbanjmyauz Siujcin Siuj-yoz hwnj le dangzgoq daih'it “minzczu doxgiet ranz caen ndeu”. Gyoengq lwghag dingq lauxsae lwnhgangj、ciengjidap cihsiz minzczu、veh veh'aenndoengi、guh doxgaiq soujgoeng、boq aenvenz、diuq foux doxgiet daengj. Neix hawj gyoengqde it mienh guhcaemz it mienh hag doxgaiq, caenn dang daejniemh gak cungj vwnzva minzczu, baezlaeng gag rox henhoh gak minzczu doxgiet, ndiepgyaez guek-

coj, caeuq gak minzczu doengzhag huzndei caemhyouq, cukmaenh gij eiqsik caezcaemh Cunghvaz Minzczu, doengzsim caezcauh aen loq-siengj Cungguk. Aen hagdangz neix dwg aen hagdangz senjdieg banggunz anceiq ndeu, ndawde miz Myauzczu、Yauzczu、Dungcu、Bouxcuengh、Mulaucuz、Suijcu、Bouxgun daengj lai aen minzczu, gak minzczu lauxsae lwghag doxhuz doxndei doxgyau doxyungz, couh lumj ranz caen ndeu.

(Vangz Cwngz Lungz Veilinz / 黄诚 龙慧琳)



▲ Gyoengq canghfwen hwnj daiz eu fwen.

Dasinh Laebbaenz Aen Dieggiek Hag Fwen Wnhcwngz

大新成立恩城山歌学习基地

Mboengqneix, Dasinh Yen venjbaiz laebbaenz le Dasinh Aenbiengz Fwen Hezvei Aen Dieggiek Hag Fwen Wnhcwngz. Yienhciengz aen venjbaiz yizsiz, bak geij boux canghfwen ndang daenj buhvaq minzczu, gag bien gag eu le doengh gij fwen miz dieg de daegsaek haenx. Lumjbaenz aeu diuhsang Bouxcuengh Dasinh、sei sam coenz、seibaiz daengj diuh Dasinh gag miz de eu ok gojgaeq aendangj、vwnzmingz lajmbanj、gak minzczu huzndei daengj, ciengq ok gij sim gyoengqvunz gyo'mbaiq aendangj、dingq vah aendangj、riengz aendangj byaij. Gyoengqde cungj naeuz, gij vah youqgaenj Siz cungsuhi youq Aen Hoih Hong Minzczu Cunghyangh gangj de hawj vunzmbanj cungj sim' angq gikdoengh raeuh, baezlaeng gyoengqde aeu engq roengzrengz ciepcienz caeuq fatyienz gij vwnzva minzczu, hawj doengh boux beixnuengx gak minzczu daj gij fwen Bouxcuengh ndawde roxnaj vwnzva Bouxcuengh, coicaenh gak minzczu doxgyau doxyungz doxndei.

Gyawj geij bi neix, yienh de yawjnaek hong ciepcienz fwen aenbiengz, youq gak yangh cin cimhra、bangrex caeuq gungganq canghfwen, lij hai ban son eu fwen dem. Seizneix, daengx yienh mbanjmbanj cungj dap daizheiq eu fwen, vwnzva fwnhvez gig naekna, vunzmbanj cungj dawz eu fwen dangguh cungj ciuzlouz moq ndeu, gij saedceij vwnzva cingsaenz vunzlai bienqndaej engq mizyinx, caemhcaiq coicaenh gak minzczu doxgiet.

(Liengz Gveivah Lij Hozvei / 梁桂花 李河慧)